



Republika e Kosovës
Republika Kosova – Republic of Kosovo



Komuna e Prishtinës
Opština Priština – Municipality of Prishtina

EKSTRAKT I PROCESVERBALIT

Të mbledhjes së parë të rregullt të Kuvendit të Kryeqytetit, mbajtur më 27.2.2026, duke filluar në orën 10:00.

Në mbledhje morën pjesë: Fehmi Kupina, (Lidhja për Prishtinën), kryesues i Kuvendit, Bujar Gashi (LDK), Bekim Gashi (LDK), Milazim Vitija (LDK), Fadil Aliu (LDK), Egzon Pacolli (LDK), Dasmor Durmishi (LDK), Shefqet Osmani (LDK), Jeta Rafuna Hasani (LDK), Donjeta Dragusha (LDK), Dhurata Jahaj Retkoceri (LDK), Lindita Rexhepi Osmani (LDK), Rifadije Sopi (LDK), Amir Simnica (LDK), Agron Canolli (PDK), Leutrim Retkoceri (PDK), Besianë Musmurati (PDK), Yll Muriqi (PDK), Granit Geci (PDK), Plator Gërdovci (PDK), Florian Beka (PDK), Kumrije Shabani Ramadani (PDK), Arbnora Ajeti (PDK), Fjolla Vukshinaj Reçica (PDK), Trim Sylja (PDK), Gëzim Sveçla (LVV), Jeta Dida Bujari (LVV), Çlirim Gërbeshi (LVV), Feim Osmani (LVV), Nora Kelmendi (LVV), Besart Krasniqi (LVV), Nexhmije Gjema (LVV), Lumnije Mikullovc (LVV), Leonora Shabani - Bajraktari (LVV), Kreshnik Smajlaj (AAK), Endrit Gashi (AAK), Erblina Tahiraj (AAK), Betim Abdullahu (Lidhja e Prishtinës), Arbentia Murseli Haxholli (Lidhja e Prishtinës), Teuta Kadiu Gjinolli (Lidhja e Prishtinës), Besa Shahini (PSD), Endrit Zabërgja (Nisma), Jeton Mehmeti (Guxo), Valbona Ajeti (AAK).

Munguan: Etnik Mustafa (LDK), Ilirik Musliu (PDK), Mrika Limani Myrtaj (LVV), Berita Abazi Muhadri (LVV), Enver Redenica (LVV), Yll Bogaj (AAK).

Të pranishëm ishin edhe: Përparim Rama, Kryetar i Kryeqytetit, Shkëmb Manaj, nënkryetar i Komunës, Valbona Makolli, drejtore e Drejtorisë së Financave, Sokol Havolli, drejtor i Drejtorisë së Investimeve Kapitale, Gëzim Kastrati, drejtor i Drejtorisë së Transformimit, Florent Maliqi, drejtor i Drejtorisë së Urbanizmit dhe Mjedisit, Gent Begolli, drejtor i Drejtorisë së Kadastrit, Sibel Halimi, drejtore e Drejtorisë së Kulturës, Bekim Brestovci drejtor i Drejtorisë së Inspeksionit, Lulzim Fushtica, drejtor i Drejtorisë së Sigurisë dhe Emergjencave, Izet Sadiku, drejtor i Drejtorisë së Shëndetësis, Samir Shahini, drejtor i Drejtorisë së Arsimit, Donat Gashi, drejtor i Drejtorisë së Rinisë, Kushtrim Mushica, drejtor i Drejtorisë së Sportit, përfaqësues të OSBE-së, përfaqësues të KFOR-it dhe të medieve.

Mbledhjen e hapi dhe e kryesoi Fehmi Kupina, kryesues i Kuvendit, i cili i njoftoi të pranishmit për një ndryshim që ka ndodhur në përbërje të këshilltarëve të

Kuvendit, ku pas dorëheqjes së Egzon Azemit nga radhët e LVV, atë e zëvendëson këshilltari i ri Çlirim Gërbeshi, nga radhët e LVV-së, i cili bëri betimin sipas legjislacionit në fuqi.

Për këtë mbledhje kryesuesi propozoi këtë

Rend dite:

1. Miratimi i ekstraktit të procesverbalit të seancës inauguruese dhe të seancës së jashtëzakonshme të Kuvendit të Kryeqytetit;
2. Propozim-vendimi për themelimin e Komitetit për Politikë dhe Financa;
3. Propozim-vendimi për caktimin e grupit punues për hartimin e planit vjetor të punës së Kuvendit të Kryeqytetit për vitin 2026;
4. Propozim-Vendimi për bartjen e 45 normave, pozitive nga niveli i arsimit të mesëm në nivelin parafillor dhe fillor të mesëm të ulët;
5. Miratimi i rregullores për caktimin e procedurave dhe formave për dhënien në shfrytëzim të pronës së paluajtshme të Komunës së Prishtinës për më pak se një vit, sipas rekomandimit nga Ministria e Administrimit të Pushtetit Lokal;
6. Miratimi i ndryshimit dhe plotësimit të Rregullores për ndarjen e subvencioneve nga Komuna e Prishtinës;
7. Pyetje dhe përgjigje;
8. Të ndryshme.

Kryesuesi hapi diskutimin rreth pikave të rendit të ditës.

Osman Bilaca tha se në vend të miratimit të ndryshimit dhe plotësimit të Rregullores për ndarjen e subvencioneve nga Komuna e Prishtinës, propozohet propozim-vendim për dërgimin e Rregullores për ndarjen e subvencioneve të Komunës së Prishtinës në diskutim publik, ndërsa miratimi i saj do të bëhet pas përfundimit të diskutimit publik.

Kryetari propozon që Komuna e Prishtinës të mbështesë programin e bursave Chevening Scholarships, përmes financimit të dy granteve shtesë nga 20.000 euro, në vlerë totale prej 40.000 euro. Kontribut ky që synon të plotësojë mbështetjen ekzistuese për studentët e Kosovës që ndjekin studime pasuniversitare në United Kingdom, veçanërisht në fusha strategjike, si inteligjenca artificiale dhe Big Data, duke investuar në zhvillimin afatgjatë të Prishtinës dhe të vendit.

Gëzim Sveçla paraqiti shqetësim lidhur me vonesën e mbajtjes së seancës së parë të rregullt të Kuvendit të Komunës së Prishtinës dhe për mungesën e trajtimit të disa çështjeve të rëndësishme, si raporti i auditimit, rregullorja e “Prishtina Parking”, mungesa e raportimit të kryetarit para Kuvendit dhe mungesa e transparencës në publikimin e emërimeve në faqen zyrtare të Komunës së Prishtinës. Sveçla deklaroi në emër të LVV-së, se ofron mbështetje për çdo vendim që është në interes të qytetit, pa kushte politike. Ai propozoi shtimin e një pike në rend dite: “Diskutim mbi situatën me mbeturinat në kryeqytet”, ndërsa për

propozimin e bërë nga z. Rama, shpreh mbështetje parimore, me kusht që të sigurohen materiale shpjeguese dhe sqarime ligjore për përdorimin e fondeve publike.

Shkëmb Manaj, nënkryetar, kërkoi që të tërhiqet pika e pestë e rendit të ditës: Miratimi i Rregullores për përcaktimin e procedurave për dhënien në shfrytëzim të pronave të paluajtshme të Komunës së Prishtinës, më pak se një vit, sipas rekomandimit të Ministrisë së Pushtetit Lokal, për shkak se ju duhen disa konsultime shtesë me Drejtorinë e Pronës.

Nora Kelmendi pyeti nënkryetarin lidhur me tërheqjen e pikës së pestë nga rendi i ditës: Projektregulloren për përcaktimin e procedurave për dhënien në shfrytëzim të pronës së paluajtshme të Komunës për periudhë më pak se një vit. Ajo theksoi se kjo rregullore është sjellë në Kuvend që nga viti 2023 dhe ka kaluar disa herë në procedurë, konkretisht më 17 nëntor 2023 dhe më 14 tetor 2024, pavarësisht se rekomandimet nga MAPL janë pranuar më 9 janar 2024 dhe kanë kaluar rreth tre vjet dhe ende nuk janë adresuar çështjet ligjore të kësaj rregulloreje. Nora kërkoi sqarim nga ekzekutivi për arsyet e tërheqjes së pikës nga rendi i ditës, duke thënë se sipas grupit të saj, rregullorja nuk duhet të hiqet nga rendi i ditës pa një arsyetim të qartë. Ajo shtoi se nëse është e nevojshme që projektregullorja të dërgohet sërish në diskutim publik, kjo është e pranueshme, por duhet të jepet një arsyetim i qartë për këtë veprim.

Shkëmb Manaj, nënkryetar, sqaroi se projektregullorja është trajtuar më herët në Kuvend, por pas rekomandimeve të Ministrisë së Administrimit të Pushtetit Lokal (MAPL) është kërkuar rishikimi i disa dispozitave. Ai theksoi se rekomandimet kanë të bëjnë me mënyrën e dhënies në shfrytëzim të banesave dhe lokaleve, si dhe me çështjen e tarifave që nuk janë në përputhje me rregulloren ekzistuese për tatimet dhe me çmimet e tregut. Ai deklaroi se Drejtoria e Pronës ka propozuar disa ndryshime dhe shtesa të tjera në këtë rregullore dhe pas konsultimeve me Zyrën ligjore, planifikohet që në një nga seancat e radhës të procedohen për shqyrtim dy rregullore njëkohësisht.

Nexhmije Gjema, përgëzoi kryetarin për iniciativën lidhur me projektin për varrezat e kryeqytetit, duke e vlerësuar atë si një model të barabartë dhe institucional, të mirëpritur nga qytetarët, megjithatë kërkoi sqarime shtesë lidhur me detajet e projektit, pasi sipas saj ka paqartësi rreth pronës dhe procedurave të ndërmarra. Ajo shprehu edhe shqetësimet e ngritura nga Kisha Protestante lidhur me këtë çështje, dhe theksoi se projekti është i rëndësishëm dhe i mirëpritur për të gjithë qytetarët dhe bashkësitë fetare.

Kryetari theksoi se çështja e varrezave të kryeqytetit është një temë me rëndësi të madhe për qytetin dhe qytetarët. Gjendja aktuale e varrezave nuk është në nivelin e duhur, andaj kërkohet përmirësim. Sipas tij, Komuna ka zhvilluar diskutime me komunitetet fetare, me qëllim krijimin e një modeli të përbashkët dhe modern të varrezave, duke respektuar ritet e secilit besim dhe nevojat e të gjithë qytetarëve. Po ashtu, u bë e ditur se planifikohet edhe organizimi i një konkursi ndërkombëtar për zgjidhjet e dizajnit dhe menaxhimit të varrezave.

Besa Shahini kërkoi që gjatë rishqyrtimit të Projektregullores të dorëzohet edhe një dokument përcjellës që tregon mënyrën se si janë adresuar komentet e Ministrisë së Administrimit të Pushtetit Lokal (MAPL). Besa theksoi se komentet e MAPL-së nuk janë shpërndarë më herët te asamblistët, duke iu referuar Statutit të Kuvendit Komunal, kërkoi nga ekzekutivi që të dërgojë përgjigje me

shkrim për kërkesën e bërë më parë lidhur me planin e punës për adresimin e të gjeturave të auditorit për keqmenaxhimin e pronës publike.

Kryesuesi konstatoi se më 43 vota për, asnjë kundër dhe asnjë abstenim, u miratua propozimi i kryetarit Rama për pikë të rendit të ditës “Propozim-Vendimit për subvencionimin e studentëve të programit të bursave Chevening në fushën e inteligjencës artificiale dhe Big Data”.

Kryesuesi konstatoi se më 15 vota për, 25 kundër, 2 abstenime, nuk u miratua propozimi i Gëzim Sveçlës për pikë të rendit të ditës: “Diskutim lidhur me menaxhimin e situatës së krijuar me mbeturinat në kryeqytet”.

Kryesuesi konstatoi se më 42 vota për, asnjë kundër dhe asnjë abstenim, u miratua rendi i ditës me ndryshime.

Pika e parë

Miratimi i ekstraktit të procesverbalit të seancës inauguruese dhe të seancave të jashtëzakonshme të Kuvendit të Kryeqytetit.

Kryesuesi konstatoi se me 42 vota për, asnjë kundër dhe asnjë abstenim, u miratua ekstrakti i procesverbalit të seancës inauguruese dhe të seancave të jashtëzakonshme të Kuvendit të Kryeqytetit.

Pika e dytë

Propozim - vendimi për themelimin e Komitetit për Politikë dhe Financa.

Jeta Rafuna, në emër të grupit të LDK-së, propozoi Jeta Rafuna Hasani, Dhurata Jahaj Retkoceri dhe Amir Simnica.

Leutrim Retkoceri sqaroi se grupi i Partisë Demokratike të Kosovës mbështet formimin e Komitetit për Politikë dhe Financa dhe ndarjen e vendeve në të, duke theksuar se propozimet duhet të shqyrtohen fillimisht në Komitet përpara se të procedohen në Kuvend. Retkoceri theksoi se nuk mund të pranojnë zgjedhjen e anëtarëve me short, pasi që duhet t'i referohemi rezultatit të zgjedhjeve dhe numrin e votuesve, ku PDK ka 556 votues më shumë se subjekti i tretë. Ai kërkoi që kolegu Agron Canolli të sqarojë në detaje argumentin ligjor dhe propozimet për anëtarët e Komitetit për Politikë dhe Financa.

Agron Canolli elaboroi rëndësinë e formimit të Komitetit për Politikë dhe Financa si mekanizëm kyç të Kuvendit dhe theksoi se ndarja e vendeve duhet të bëhet mbi bazën e përfaqësimit proporcional sipas Metodës së Dehontit. Canolli shpjegoi se Komiteti ka 11 anëtarë, ku 10 vendet ndahet proporcionalisht ndërmjet subjekteve politike, bazuar në kalkulimet dhe dispozitat ligjore për barazi, përfaqësimi final është: LDK – 3 anëtarë, PDK – 3 anëtarë, LVV – 2 anëtarë, AAK – 1 anëtar dhe Lidhja për Prishtinën – 1 anëtar.

Gëzim Sveçla theksoi se ndarja e vendeve në Komitetin për Politikë dhe Financa duhet të bëhet sipas përfaqësimit në Kuvend, bazuar në numrin e mandateve të fituara, dhe jo mbi baza të tjera ose interpretime të papërshtatshme të ligjit. Sveçla sqaroi se përfaqësimi është: LDK – 3 vende, PDK – 2 vende, LVV – 2 vende, AAK – 1 vend dhe Lidhja për Prishtinën – 1 vend, ndërsa vendi i mbetur ndahet me short ose me rrotacion ndërmjet PDK-së dhe LVV-së, ndërsa çdo devijim nga ky dakordim rrezikon bllokimin e komitetit dhe funksionimin e Kuvendit.

Erblina Tahiraj deklaroi se grupi i Aleancës për Ardhmërinë e Kosovës propozon Kreshnik Smajlajn si anëtar të Komitetit për Politikë dhe Financa.

Arbenita Murseli Haxholli deklaroi se Grupi i Lidhjes për Prishtinën propozon Betim Abdullahun si anëtar të Komitetit për Politikë dhe Financa.

Kryesuesi kërkoi nga dy partitë që të propozojnë emrat e kandidatëve për Komitetin për Politikë dhe Financa, duke sqaruar se nëse nuk arrihet pajtimi, çështja mund të dërgohet në ministri për opinion ligjor. Ai theksoi se propozimet duhet të jenë në përputhje me dakordësinë e arritur në diskutimet e mëparshme.

Besianë Musmurati- deklaroi se PDK-ja i sqaroi arsyet për të cilat partisë së saj i takojnë 3 anëtarë në Komitetin për Politikë dhe Financa dhe propozon emrat: Leutrim Retkoceri, Fjolla Vukshinaj dhe Agron Canolli.

Gëzim Sveçla kritikoi vonesat dhe mosmarrëveshjet lidhur me formimin e Komitetit për Politikë dhe Financa, duke theksuar se nuk duhet të pengohet procesi nga interesat e grupeve politike. Ai kërkoi sqarime nga institucionet kompetente të Komunes së Prishtinës mbi mënyrën e propozuar dhe procedurat ligjore për zgjedhjen e anëtarëve të komitetit.

Granit Geci theksoi se procesi i formimit të Komitetit për Politikë dhe Financa është i thjeshtë dhe i qartë, duke respektuar vullnetin e qytetarëve dhe ligjin. Ai njoftoi se grupi i tij ka dhënë propozimet e veta dhe është i gatshëm t'i mbrojë këto vendime edhe përmes institucioneve kompetente ose gjyqësorit, nëse është e nevojshme, duke u bazuar në praktikën dhe formulat që përdoren në institucionet kredibile të Republikës së Kosovës.

Feim Osmani-theksoi se formimi i Komitetit për Politikë dhe Financa duhet të bëhet në përputhje me parimin e përfaqësimit dhe marrëveshjen e arritur më parë, duke shmangur dërgimin e një komiteti me anëtarë jashtë normave ligjore në ministrinë përkatëse. Osmani kërkoi që çështja të trajtohet dhe diskutohet sot në Kuvend, duke siguruar që përbërja e komitetit të jetë ligjore dhe e pranueshme për institucionet kompetente.

Leutrim Retkoceri deklaroi se për çështjen e formimit të Komitetit për Politikë dhe Financa duhet të respektohet ligji dhe parimi i përfaqësimit proporcional, duke përdorur Metodën e Dehontit dhe kalkulimet e prezantuara në Excel nga grupi i PDK-së. Retkoceri propozoi që të hidhen në votim të dy propozimet e grupeve politike, duke shmangur përdorimin e shortit, dhe nënvizoi se Komiteti duhet të funksionalizohet pa bllokime, duke garantuar përfaqësimin e drejtë të Partisë Demokratike të Kosovës me tre anëtarë.

Gëzim Sveçla theksoi se Lëvizja Vetëvendosje propozon: Nora Kelmendin, Gëzim Sveçlën dhe Berita Abazi Muhadrin si anëtarë të Komitetit për Politikë dhe Financa, duke theksuar se argumentet e tyre bazohen në udhëzimin administrativ për formimin e komiteteve të përherëshme dhe duke kërkuar që çështja të avancojë pa bllokime.

Leutrim Retkoceri tha se, edhe pse mund të kërkohet mendimi i MAPL-së, vonesat nuk duhet të pengojnë formimin e Komitetit për Politikë dhe Financa, ne nuk e pranojmë përdorimin e shortit për të vendosur përfaqësimin e PDK-së dhe Vetëvendosjes, duke nënvizuar se duhet respektuar vullneti i qytetarëve dhe ligji, dhe se çdo shkelje ligjore mbart përgjegjësi për ata që e kryejnë atë.

Gëzim Sveçla theksoi se numri i votave të qytetarëve nuk ndikon në formimin e Komitetit për Politikë dhe Financa, pasi ndarja e vendeve bëhet mbi bazën e mandateve të fituara në Kuvend. Sveçla theksoi se çdo vonesë ose bllokadë nga PDK-ja pengon funksionimin e komitetit dhe se rastet e barazimit të mandateve zgjidhen përmes marrëveshjes politike ose shortit, siç praktikohet në institucione të tjera në Republikën e Kosovës.

Kryesuesi njoftoi se do t'i hedhë në votim dy propozimet: fillimisht propozimin e z. Retkoceri, pastaj propozimin e z. Sveçla. Nëse nuk arrihet pajtim, do t'i drejtohet MAPL-së (Ministrisë së Administrimit të Pushtetit Lokal) për sqarim.

Gëzim Sveçla shprehi keqardhje ndaj kryesuesit, duke e akuzuar se po bie nën presionin e Partisë Demokratike të Kosovës (PDK) dhe po vepron në kundërshtim me ligjin. Ai theksoni se çështja është e rregulluar me udhëzim administrativ dhe se nuk ka paqartësi ligjore. Në shenjë kundërshtimi, deklaroi se ata nuk do të marrin pjesë në asnjë nga votimet, pasi i konsiderojnë ato shkelje ligjore.

Kryesuesi njoftoi të pranishmit që pasi nuk ka marrëveshje në mes të subjekteve politike për kandidatin e 11-të për KPF-në, propozon që kandidati i 11-të të zgjidhet me short. Kryesuesi e hedh në votim propozimin e tij. ku më 26 vota për, 10 kundër dhe 1 abstenim u miratua propozimi i kryesuesit.

Leutrim Retkoceri deklaroi se partia nuk e pranon që përzgjedhja e anëtarit për Komitetin për Politikë dhe Financa t'i nënshtrohet votimit, duke argumentuar se rezultati i zgjedhjeve e ka vendosur PDK-në parti të dytë me më shumë vota se Lëvizja Vetëvendosje në Prishtinë. Ai thekson se PDK do ta ndjekë këtë çështje në instanca të tjera, deri në gjykatë nëse është e nevojshme, megjithatë, nënvizon se partia respekton institucionet dhe proceset demokratike dhe nuk synon të bllokojë institucionet komunale.

Kryesuesi theksoi se pas hedhjes së shortit kandidati i tretë i takon Partisë Demokratike të Kosovës.

Leutrim Retkoceri deklaroi se, edhe pse vendi i 11-të i ka takuar Partisë Demokratike të Kosovës përmes shortit, ata mbeten të bindur se kjo pozitë duhet të përcaktohet sipas formulës së përfaqësimit dhe jo me short. Ai theksoi se, pavarësisht rezultatit aktual, çështjen do ta dërgojnë në gjykatë për të sqaruar përfundimisht parimin, në mënyrë që vullneti i qytetarëve të mos vendoset me short në kuvendet komunale.

Gëzim Sveçla propozoi Nora Kelmendin dhe Gëzim Sveçlën.

Osman Bllaca tha se KPF-ja përbëhet nga 11 anëtarë, por nga 10 anëtarët e propozuar, 4 janë gra Jeta, Dhurata, Fjolla dhe Nora. Bllaca i njoftoj se me këtë përbërje nuk mund të dërgohet lista në MAPL, për shkak të mosplotësimit të kuotës gjinore. Kërkohej që një nga burrat të zëvendësohet me një grua për të përmbushur normën e kuotës gjinore.

Betim Abdullahu tha se plotësimi i kuotës gjinore duhet të bëhet nga partitë që kanë dy ose më shumë anëtarë të propozuar, jo nga një parti që ka vetëm një përfaqësues, prandaj përgjegjësia bie te partitë më të mëdha që kanë më shumë anëtarë të propozuar.

Kryesuesi kërkoi nga Leutrimi se a mund të reflektojnë? Nëse jo, ne do të reflektojmë, ne jemi të hapur dhe të gjerë në perspektivë.

Betim Abdullahu tha se ne mund të reflektojmë, por ligjërisht PDK-ja është dashur të reflektojë. Lidhja e Prishtinës propozon Arbenita Murseli Haxholli për anëtar të KPF-së.

Kryesuesi konstatoi se më 28 vota për, 1 kundër edhe 11 abstenime u miratua vendimi për themelimin e Komitetit për Politikë dhe Financa.

Pika e tretë

Propozim-Vendimi për caktimin e grupeve punuese për hartimin e planit vjetor të punës së Kuvendit të Kryeqytetit për vitin 2026.

Jeta Rafuna tha se në emër të grupit të asamblistëve të LDK-së propozojmë zonjën Rifadie Sopi.

Leutrim Retkoceri tha se Partia Demokratike e Kosovës e propozon asamblisten Arbnora Ajeti.

Gëzim Sveçla tha se Lëvizja Vetëvendosje e propozon Çlirim Gërbeshin.

Kreshnik Smalaj tha se Aleanca për Ardhmërinë e Kosovës e propozon Erblina Tahiraj.

Betim Abdullahu tha se Lidhja e Prishtinës propozon Teuta Kadiu-Gjinolli.

Shkëmb Manaj nga ekzekutivi propozon Sokol Havollin për anëtar të komisionit.

Kryesuesi tha se nga Sektori për punë të Kuvendit e propozoj Luljeta Selimin, dhe nga Zyra ligjore Djellon Gjonbalaj.

Endrit Zabërgja u shpreh se së pari, më intereson të dijë pse tri partitë tona nuk morën të drejtën e propozimit dhe përfaqësimit në këtë grup punues, duke pasur parasysh që në mandatin e kaluar kemi qenë pjesë e tij dhe kemi kontribuar në planin e punës. Zabërgja tha se është e rëndësishme që të trajtohem si subjekte të ndryshme politike dhe të respektohen të drejtat tona legjitime për përfaqësim. Gjithashtu, dëshiroj të nënvizoj nevojën për më shumë seriozitet në punën e grupit, duke përfshirë edhe udhëheqjen e kryesuesit të Kuvendit në këtë proces. Ai tha se planifikimi i qartë i seancave dhe çështjeve për diskutim është i domosdoshëm, ashtu si transparenca ndaj

qytetarëve dhe informimi i aksionarëve të ndërmarrjeve publike. Uroj që të mos harrohen tri partitë tona, të cilat kanë përfaqësim dinjitoz dhe meritojnë të respektohen.

Kryesuesi tha se do të veprojmë siç u propozua dhe do të përfshihen të gjithë, edhe pse disa nuk kanë grup të formalizuar, dhe kërkon deklarin nëse edhe PSD dhe Lista Guxo pajtohen të jenë pjesë e grupit punues.

Besa Shahini tha se Rregullorja nuk e kërkon domosdoshmërisht përfaqësimin e partive të vogla, por mbetet në vlerësimin tuaj nëse pjesëmarrja jonë i shërben punës.
Kryesuesi propozoi që të gjithë të përfshihen në përfaqësim.

Kryesuesi konstatoi se, më 38 vota për, asnjë kundër dhe 2 abstenime, u miratua Vendimi për caktimin e grupeve punuese për hartimin e planit vjetor të punës së Kuvendit të Kryeqytetit për vitin 2026.

Pika katërt

Propozim-Vendime për bartjen e 45 normave pozitive nga niveli i arsimit të mesëm në nivelin parafillor dhe fillor të mesëm të ulët.

Samir Shahini theksoi se Drejtorja e Arsimit kërkon mbështetjen e Kuvendit për bartjen e disa normave të lira nga arsimit i mesëm i lartë, nevojat ka ardhur për shkak të rritjes së kapaciteteve në institucionet parashkollore dhe fillore. Shahini deklaroi se hapja dhe zgjerimi i disa kopshteve kanë krijuar nevojë për staf shtesë dhe sipas ligjit për buxhet, kërkohet edhe vendim i Kuvendit Komunal për këtë ndryshim, prandaj propozoj bartjen e 45 normave, 20 në arsimin parafillor dhe 25 në arsimin fillor.

Rifadije Sopi, në emër të grupit të LDK-së, shprehu mbështetje për vendimin e bartjes së 45 normave nga arsimit i mesëm i lartë në arsimin parafillor dhe fillor, bazuar në analizën e nevojave reale. Ky riorganizim synon shpërndarje më të drejtë të stafit dhe forcimin e arsimit parafillor dhe fillor, në interes të fëmijëve dhe familjeve të kryeqytetit.

Besianë Musmurati shprehu shqetësimin se, nëse bartja e normave nga shkollat e mesme në ato fillore mund të krijojë mungesë stafi në arsimin e mesëm, veçanërisht në shkollat si ajo e muzikës. Andaj sugjeroi që përveç këtij riorganizimi, Komuna të kërkojë nga Ministria e Arsimit dhe Ministria e Financave rritjen e numrit të normave për Prishtinën.

Samir Shahini bëri të ditur se kërkesa për rritjen e grantit specifik nga Ministria e Arsimit për institucionet parafillore në Prishtinë është përsëritur disa herë, por ende nuk ka marrë përgjigje. Ndërkohë, në arsimin e mesëm, numri i nxënësve ka rënë dhe bartja e normave nuk do të cenojë kapacitetet ekzistuese, duke ruajtur rezerva për nevojat të mundshme në të ardhmen.

Leonora Shabani tha se propozimi për transferimin e 45 normave nga arsimit i mesëm në nivelin parafillor dhe fillor, synon riorganizimin e kapaciteteve sipas nevojave të shkollave dhe përmirësimin e cilësisë së arsimit. Leonora deklaroi se Grupi i Lëvizjes Vetëvendosje mbështet

vendimin, por kërkon më shumë transparencë dhe raporte analitike të detajuara për vendime të tilla, duke theksuar rëndësinë e llogaridhënies dhe planifikimit afatgjatë në arsimin e kryeqytetit.

Erblina Tahiraj deklaroi se grupi mbështet propozim-vendimin, duke theksuar se shpërndarja e normave duhet të bazohet në nevojat reale të nxënësve dhe institucioneve, me analiza të sakta dhe transparente, pa dëmtuar cilësinë e arsimit në asnjë nivel.

Betim Abdullahu bëri të ditur se Grupi i Lidhjes së Prishtinës e mbështet bartjen e normave për të siguruar funksionim të mirë dhe të qendrueshëm të shkollave dhe procesit mësimor në kryeqytet.

Besa Shahini deklaroi se e mbështet kalimin e 45 normave, por shqetësimi kryesor mbetet arsimi parashkollor në Prishtinë, i cili mbulon vetëm 10% të nevojave reale. Problemet kryesore janë mungesa e hapësirave dhe mbingarkesa e shkollave, që ndikojnë negativisht në cilësinë e mësimin dhe mbarëvajtjen e institucioneve. Besa sugjeron adaptimin e hapësirave ekzistuese për kopshte dhe çerdhe, rishikimi i orarit mësimor dhe krijimi i një plani të qartë për menaxhimin e arsimit parashkollor dhe fillor në qytet.

Valbona Ajeti theksoi se vjen nga sektori i arsimit dhe e mbështet fuqishëm bartjen e normave, duke marrë parasysh rritjen e kapaciteteve të institucioneve parashkollor dhe shtimin e numrit të fëmijëve, si dhe nevojën për funksionimin e rregullt të procesit edukativo-arsimor.

Fadil Aliu u shpreh në mbështetje të bartjes së normave, sidomos në arsimin parafillor, duke theksuar se rritja e numrit të fëmijëve dhe nevojat e kryeqytetit kërkojnë shfrytëzim të numrave të caktuar nga Ministria e Arsimit. Aliu shprehet se plotësimi i këtyre normave është i domosdoshëm për të mundur funksionimin e plotë të institucioneve arsimore, pavarësisht kapaciteteve buxhetore, sepse numrat e stafit përcaktohen nga niveli qendror dhe kërkon që ato të përditësohen sipas regjistrimit të fundit të popullsisë.

Gëzim Sveçla theksoi se normat e propozuara për institucionet e reja parashkollore e përfshijnë edhe kopshtin e ri që pritet të hapet në lagjen "Kolovica e Re", duke theksuar se arsyetimi nuk është përditësuar pasi çerdhet në lagjet "Dardania" dhe "Pejtoni" tashmë janë funksionale. Njëherësh u kërkua sqarim për statusin e drejtorit që po prezanton, nëse është emëruar në mandatin e ri apo vazhdon nga mandati i kaluar.

Samir Shahini i falënderoi të gjitha grupet parlamentare për mbështetjen dhe bashkëpunimin rreth kësaj çështjeje, duke theksuar rëndësinë e unitetit, pavarësisht përkatësisë politike, ai po ashtu sqaroi se propozimi është përditësuar dhe është i njëjti që ka kaluar vitin e kaluar në Komisionin për Politikë dhe Financa, pasi rrethanat nuk kanë ndryshuar. Shahini theksoi se objekti i ri në lagjen "Kolovica", nuk është përfshirë në këtë kalkulim, por mund të shfrytëzohet përmes një riorganizimi të normave ekzistuese. Ai tha se kapaciteti i paraparë mund të mos i përmbushë të gjitha kërkesat dhe se për këtë nevojitet një analizë shtesë, pasi kopshti ende nuk është funksional dhe tha se ushtrimi i detyrës së drejtorit bëhet mbi bazën e një vendimi të vlefshëm.

Shkëmb Manaj u përgjigj lidhur me pyetjen e zotit Sveçla. Sa për informim të anëtarëve të Kuvendit dhe qytetarëve të Prishtinës, nënkryetarët dhe të gjithë drejtorët tashmë kanë vendime në mandatin e ri të z. Rama dhe se ato pritet të publikohen së shpejti.

Besianë Musmurati u shpreh se duhet një qasje konstruktive përtej debateve politike, me fokus te qytetarët dhe shërbimet që ata marrin, nëse Komuna e Prishtinës planifikon ndërtimin e çerdheve të reja ose zgjerimin e hapësirave në shkolla, është e domosdoshme edhe përditësimi i stafit. Besiana po ashtu theksoi se kjo ka qenë një problematikë e vazhdueshme ndër vite dhe u bën thirrje që, në bashkëpunim me përfaqësuesit e Lëvizjes Vetëvendosje, të dërgohet një kërkesë në ministri për ta shtyrë përpara këtë çështje në të mirë të qytetarëve të Prishtinës.

Feim Osmani tha se nevoja për norma të reja në arsimin parafillor dhe fillor nuk vihet në dyshim, megjithatë u vlerësua se kërkesa e paraqitur do të duhej të ishte shoqëruar me një raport sqarues, në mënyrë që anëtarët e Kuvendit të kenë një bazë më të plotë për diskutim dhe vendimmarrje. Osmani theksoi se kërkesat drejtuar Ministrisë së Arsimit duhet të jenë të detajuara dhe të përmbajnë specifika të qarta lidhur me institucionet për të cilat kërkohet shtimi i normave, veçanërisht në arsimin parafillor, duke pasur parasysh rritjen e numrit të çerdheve dhe nevojën për staf të ri. Ai kërkoi sqarim për mënyrën se si është adresuar kërkesa në ministri dhe çfarë përgjigjeje ka marrë Komuna, me qëllim që kjo çështje të trajtohet në mënyrë institucionale dhe jo politike.

Fadil Aliu- deklaroi se Komuna e Prishtinës nuk ka kërkuar rritje të buxhetit, pasi përditësimi i tij është bërë në mënyrë automatike si rezultat i aplikimit të të dhënave nga regjistrimi i popullsisë, dhe duke u bazuar në këtë regjistrim, Komunës së Prishtinës i shtohen rreth 800 vende pune shtesë, të cilat konsiderohen të domosdoshme për funksionimin e sektorëve si arsimit, çerdhet dhe qendrat e mjekësisë familjare. Aliu tha se pavarësisht kërkesave të vazhdueshme drejtuar ministrisë përkatëse për shtimin e normave, kjo nuk ka ndodhur dhe si shembull u përmend kërkesa e vitit 2024 për rekrutimin e psikologëve, ku Komuna është obliguar të bëjë punësimin, por pa u reflektuar shtimi i numrit të tyre nga ministria, dhe në këtë kontekst u theksua se funksionalizimi i çerdheve të reja është i vështirë pa shtimin e stafit të nevojshëm nga niveli qendror.

Feim Osmani bëri të ditur se Ministria është bazuar në të dhënat e regjistrimit të fundit të popullsisë për ndarjen e grantit për arsim, duke reflektuar rritjen e numrit të popullsisë, dhe në këtë kontekst, u vlerësua se Drejtoria e Arsimit do të duhej të kishte dërguar kërkesa dhe raporte të detajuara me specifika të qarta për normat e nevojshme. Osmani kërkoi sqarim nga drejtori përkatës lidhur me kërkesat e dërguara gjatë periudhës 2024–2025 dhe përgjigjet e marra nga ministria, me qëllim që anëtarët e Kuvendit të informohen saktë mbi hapat institucionalë të ndërmarrë dhe çështja duhet trajtuar në mënyrë bashkëpunuese, duke pasur parasysh se askush nuk ka interes ta dëmtojë Prishtinën në aspektin e arsimit.

Kryesusi konstatoi se më 39 vota për, asnjë kundër dhe asnjë abstenim, u miratua Vendimi për bartjen e 45 normave, pozitive nga niveli i arsimit të mesëm në nivelin parafillor dhe fillor të mesëm të ulët.

Pika e pestë

Propozim - Vendimi për subvencionimin e studentëve të programit të bursave në fushën e inteligjencës artificiale dhe Big Data, në vlerë prej dyzet mijë euro, (40.000).

Shkëmb Manaj u shpreh se propozimi për ndarjen e 40,000 eurove nga kategoria e subvencioneve, të cilat lidhen me bursa ndërkombëtare, u paraqit në fillim të seancës nga kryetari i Kryeqytetit me arsyetimin përkatës. Ai kërkoi nga të gjithë anëtarët e Kuvendit që ta miratojnë propozimin në bazë të këtij arsyeimi.

Feim Osmani theksoi se pika e propozuar nga kryetari Rama, ka për qëllim ndarjen e 40,000 eurove nga buxheti i Kryeqytetit si subvencion për bursa, që mund të përfshijnë qytetarë nga të gjitha komunat e Kosovës, jo vetëm nga Prishtina. Osmani deklaroi se mungesa e dokumentacionit dhe sqarimeve nga kryetari për pjesëmarrjen e institucionit donator dhe për mbulimin aktual të bursave, duke kërkuar informacion shtesë nëse ka mungesë të fondeve nga organizatori ose donatori kryesor, sa është shuma që duhet plotësuar në këtë rast. Ai tha se nuk janë dhënë sqarime të mjaftueshme, prandaj diskutimi i mëtejshëm është i nevojshëm për të vendosur mënyrën e votimit nga asamblistët dhe për të siguruar transparencë lidhur me përdorimin e mjeteve publike për arsimin specifik, përfshirë fushat si inteligjenca artificiale.

Erblina Tahiri tha se Grupi i Aleancës për Ardhmërinë e Kosovës e mbështesim fuqishëm këtë pikë.

Arbenita Murseli Haxholli tha se Lidhja e Prishtinës e përkrah propozimin e kryetarit për ndarjen e bursave për studentët që do të studiojnë në Mbretërinë e Bashkuar, por kërkon sqarime shtesë lidhur me vendimin, sepse nuk duhet të votohet menjëherë pa u kuptuar procedura dhe rrjedha e mëtejshme deri në ekzekutimin e bursave.

Besa Shahini pyeti nënkryetarin lidhur me bursat, se a do të jenë të obliguar studentët të kthehen dhe të punojnë për institucionet publike të Komunës së Prishtinës pas përfundimit të studimeve, dhe cilat janë mekanizmat e monitorimit për të siguruar këtë dhe në çfarë forme do të mbikëqyren kontratat për të garantuar që investimi në arsim kthehet në shërbim të Komunës, duke marrë shembull nga praktikat e dhënies së bursave nga Republika e Shqipërisë dhe Republika e Kosovës. Shahini kërkoi të paraqiten sqarime shtesë në mbledhjen e ardhshme, në mënyrë që asamblistët të mund ta votojnë të informuar dhe të sigurohet që studentët kontribuojnë në zhvillimin dhe mbarëvajtjen e punëve të Komunës.

Endrit Zabërgja u shpreh se bursat për të rinjtë e Prishtinës janë jo vetëm të nevojshme, por edhe të domosdoshme për mbështetjen financiare dhe institucionale të tyre në arritjen e qëllimeve akademike. Edhe pse dokumentacioni mund të mos jetë plotësisht i përgatitur, kjo nuk duhet të ndalojë mbështetjen e iniciativave të mira, pasi organet komunale mund të rregullojnë detajet, përfshirë kontratat. Zabërgja theksoi rëndësinë e fokusit të Kuvendit Komunal në mbështetjen e të rinjve, veçanërisht në fusha inovative, si inteligjenca artificiale, Ai vlerësoi rolin e Drejtorisë së Rinisë, Drejtorisë së Arsimit dhe të gjitha drejtorive komunale për të aftësuar të rinjtë në teknologji moderne. Ai tha se Nisma Social Demokrate e mbështet plotësisht iniciativën dhe angazhohet të japë kontribut për forcimin profesional të të rinjve të kryeqytetit.

Nora Kelmendi theksoi se u ngritën pyetje për nënkryetarin lidhur me ndarjen e bursave, duke theksuar se Komuna e Prishtinës vetëm do të sigurojë 40,000 euro, ndërsa ndarja e bursave po

bëhet pa thirrje publike dhe vetëm me vendim të Kuvendit të Kryeqytetit. Ajo përmendi gjetjet e auditorit për vitet 2022, 2023 dhe të fundit, ku vendimet për ndarje e subvencioneve dhe mbështetje të OJQ-ve janë të jashtëligjshme, për shkak të mungesës së thirrjeve publike. Nora kërkoi dokumentacion shtesë për të parë nëse vendimi është jashtëligjor dhe asamblistët nuk mund ta votojnë derisa të sqarohet situata ligjore.

Shkëmb Manaj bëri të ditur se nuk ka buxhet shtesë për këtë iniciativë. Fondi vjen nga buxheti ekzistues i subvencioneve të Kryetarit, i cili ka të drejtë të ndajë pjesë të këtij buxheti, por për shkak të shumës së bursave (dy kuota), Kryetari ka kërkuar miratimin e Kuvendit për ndarjen e tyre. Ai theksoi se mbështetja nga Kuvendi është për dy kuota shtesë, ndërsa procedurat e ndarjes dhe zbatimit të bursave zhvillohen nga programi përkatës dhe për këto dy kuota, kërkohet që përparësi të kenë studentët e Komunës së Prishtinës, në kuadër të programit të bursave.

Fadil Aliu bëri të ditur se bursat menaxhohen nga Ambasada britanike, përmes programit Chevening, Foreign Commonwealth Office – FCO, ku përzgjedhja dhe thirrja për aplikim bëhen nga Ambasada, sipas procedurave të saj transparente dhe online. Aliu deklaroi se Kuvendi duhet të vendosë vetëm për mbështetjen e dy bursave nga ky program, të cilat i shtojnë dy të tjera, duke krijuar gjithsej katër bursa, prandaj kërkoi që përfituesit e dy bursave të propozuara të jenë qytetarë të Komunës së Prishtinës nga fushat e parashikuara, ndërsa procedurat e përzgjedhjes dhe kriteret e aplikimit janë të vendosura nga Ambasada britanike.

Gëzim Sveçla- ngriti shqetësimin lidhur me aspektin ligjor të propozimit për bursat, pavarësisht se të gjitha grupet kanë vullnet ta mbështesin. Ai tha se nuk ka pasur asnjë dokumentacion të dorëzuar nga Kryetari ose Kuvendi për shqyrtim dhe kërkesa që përfituesit të jenë qytetarë të Prishtinës nuk ka marrë sqarim të qartë nga Ambasada Britanike sepse ekziston shqetësimi për precedentë të mëparshëm, ku mjete të dedikuara për subvencione janë bartur tek entitete të tjera (si në rastin e UNDP-së për 5 milionë euro), duke krijuar pyetje për ligjshmërinë e procesit, megjithëse vullneti për mbështetje ekziston, vendimi nuk mund të miratohet pa dokumentacion të plotë dhe pa njohuri të detajuara për procedurat e përdorimit të mjeteve publike.

Kryesuesi e hodhi në votim këtë pikë nga rendi i ditës dhe konstaton se më 26 vota për, 3 kundër edhe asnjë abstenim, u miratua Vendimi për subvencionimin e studentëve të programit të bursave në fushën e inteligjencës artificiale dhe Big Data, në vlerë prej dyzetmijë euro, (40.000).

Pika gjashtë

Miratimi i ndryshimit dhe plotësimit të Rregullores për ndarjen e subvencioneve nga Komuna e Prishtinës.

Shkëmb Manaj u shpreh se sot kemi sjell para jush për plotësim-ndryshim Rregulloren për ndarjen e subvencioneve të Komunës së Prishtinës, me fokus në dy pika kryesore: Qiratë për qytetarët e zhvendosur, ku rregullorja aktuale parashikon subvencionim të qirave deri në pesë vjet dhe propozohet që kjo normë të lejojë zgjatje për raste të veçanta, si qytetarët e zhvendosur nga qendra e qytetit për ndërtimin e parkingut, derisa të gjendet një zgjidhje për banim të përhershëm dhe shpenzimet e funeralit, ku kërkohet rritja e shumës së subvencionit për anëtarët e ngushtë të

familjes nga 300 në 400 euro. Manaj theksoi se është i rëndësishëm diskutimi publik, duke përfshirë grupet parlamentare, OJQ-të dhe qytetarët, për të dhënë kontribut në përmirësimin e rregullores para miratimit final në Kuvend.

Gëzim Sveçla tha se qasja e kryesuesit për të hedhur çështjet në votim pa u diskutuar më parë, nuk është e drejtë dhe duhet të shmanget arbitrariteti. Përgjegjësia e kryesuesit si përfaqësues i Kuvendit, është që kërkesat e asamblistëve të trajtohen dhe t'u jepen përgjigje. Ai deklaroi se sa i përket çështjes së rregullores, është mirë që në fillim të rendit të ditës është ndryshuar, sepse nuk mundet me u bë ndryshimi i rregullores pa dalë në dëgjim publik.

Nora Kelmendi theksoi se projekt-rregullorja do të dalë në dëgjim publik, por do të përmendi disa nene, siç janë: neni 25, për subvencione për skema të veçanta, këtu duhet të përfshihet një nen që përcakton kriteret dhe dokumentacionin e nevojshëm për ndarjen e subvencioneve, pasi kriteret aktuale nuk janë të qarta; neni 30, për subvencione me vendim të Kuvendit, ku ky nen është i jashtëligjshëm sipas raportimeve të auditorit (2022–2024), pasi nuk ka bazë ligjore për ndarje të subvencioneve mbi 20,000 euro me vendim të Kuvendit dhe nëse ekziston një bazë ligjore, duhet të sqarohet dhe publikohet. Nora rekomandon që të bëhet Publikimi i përshkrimeve të projekteve dhe arsytimit për subvencionim në faqen zyrtare të Komunës, krijimi i komisioneve monitoruese për ndjekjen e përfituesve të subvencioneve dhe granteve dhe caktimi i afateve për monitorimin e çdo aktiviteti të financuar. Ajo tha se këto masa synojnë krijimin e një mjedisi transparent dhe të drejtë, që nxit zhvillimin ekonomik dhe mundësi të barabarta për qytetarët e Prishtinës, dhe u kërkua që rekomandimet të merren parasysh.

Shkëmb Manaj deklaroi se rregullorja është miratuar pas diskutimeve në Kuvend dhe komentet e dhëna janë përfshirë, me mundësi që të shtohen edhe të tjera nëse diçka është lënë jashtë. Ai argumenton se neni 30 duhet të mbetet, pasi subvencionimi i ndërmarrjeve publike dhe i kopshteve me bazë në komunitet ka ndodhur vazhdimisht në Prishtinë, por pa një bazë të qartë ligjore. Manaj tha se kjo dispozitë krijon bazën ligjore për subvencione edhe për institucione të tjera komunale në të ardhmen, si institucionet kulturore. Sa i përket kopshteve me bazë në komunitet, ai pajtohet që në të ardhmen ato mund të planifikohen përmes buxhetit, pas një analize nga Drejtoria e Arsimit, ndërsa për ndërmarrjet publike, thekson se subvencionimi ndodh zakonisht në raste emergjente, të cilat nuk mund të parashikohen në buxhet. Ai propozon që për këtë vit të mbetet dispozita aktuale, ndërsa nga viti i ardhshëm të planifikohet më mirë në kuadër të buxhetit komunal.

Besart Krasniqi tha se propozimi për rritjen e subvencionit për shpenzimet e varrimit në 400 euro, ka qenë fillimisht propozim i Lëvizjes Vetëvendosje, i cili ishte kundërshtuar më parë, por tani po mbështetet një vit më vonë. Ai shpreh kënaqësinë që ky propozim më në fund është marrë parasysh dhe konfirmon se grupi i Vetëvendosjes do ta mbështesë këtë rritje. Krasniqi rikujton një kërkesë të katër imamëve të Prishtinës, nga viti 2023, drejtuar Drejtorisë së Shërbimeve Publike, që hapja e varreve në fshatrat Bardhosh, Hajvali, Matiçan dhe Zllatar të kryhet nga ndërmarrja “Gjelbër” (ish-“Hortikultura”). Sipas tij, kjo kërkesë është bërë për shkak se kompanitë private aplikojnë çmime shumë më të larta, ndërsa shërbimi nga ndërmarrja publike do të ishte më i përballueshëm për qytetarët. Ai thekson se ende nuk ka pasur përgjigje nga drejtoria dhe kërkon që këtyre fshatrave t'u mundësohet kjo e drejtë, duke lehtësuar barrën financiare të familjeve në raste mortore.

Feim Osmani theksoi se rregullorja do të shqyrtohet në dëgjim publik dhe vërejtjet do të dorëzohen përsëri nga grupi i tyre. Osmani nënvizon dallimin mes ndërmarrjeve publike, që mund të gjenerojnë fitim, dhe kopshteve me bazë në komunitet, që janë OJQ dhe nuk krijojnë fitim, për këto të fundit përmend marrëveshjen e vitit 2016 me Komunën, e cila mund të rinovohet çdo vit për të siguruar subvencionimin e tyre.

Kryesusi konstatoi se më 31 vota për, 1 kundër dhe 1 abstenim miratohet Vendimi për vënien në diskutim publik për ndryshimin dhe plotësimin e Rregullores për ndarjen e subvencioneve nga Komuna e Prishtinës.

Pika e shtatë Pyetje dhe përgjigje

Besa Shahini- tha se është shqetësuese gjendja alarmante e mbeturinave në Prishtinë dhe kritikoi faktin që nuk u lejua diskutimi i kësaj teme si pikë e veçantë në rendin e ditës. Ajo parashtroi një pyetje konkrete: Pse kryetari i Komunës po refuzon të nënshkruajë një marrëveshje me kompaninë “Pastrimi” për menaxhimin ekskluziv të mbeturinave për 10 vitet e ardhshme, gjë që është kusht për realizimin e një investimi prej rreth 70 milionë eurosh nga BE-ja dhe Qeveria gjermane për përmirësimin e gjithë sistemit të menaxhimit të mbeturinave në kryeqytet? Ajo përmend si shembull të suksesshëm modelin e financimit të ndërmarrjes “Termokos”.

Nexhmije Gjema kritikoi mungesën e seriozitetit dhe komunikimin nga ekzekutivi, duke theksuar se kërkesat dhe email-et për informata shpesh mbeten pa përgjigje. Gjema ngre shqetësime për bllokimin e trotuareve në Lagjen e Muhaxhirëve, që rrezikon sigurinë e këmbësorëve dhe fëmijëve, Gjithashtu kërkon sqarime për memorandumun e 26 dhjetorit 2025, lidhur me menaxhimin e mbeturinave, për angazhimin e operatorëve privatë rreth 950 mijë euro ndërkohë që ndërmarrja “Pastrimi” është në krizë financiare, si dhe për anulimin e një tenderi prej 100 mijë eurosh për shërbimet e avokaturës, duke kërkuar transparencë dhe masa për të shmangur shkelje të ngjashme në të ardhmen.

Feim Osmani shpreh shqetësim për mungesën e kryetarit dhe drejtorëve në seancë, duke theksuar se pyetjet dhe kërkesat e qytetarëve duhet të adresohen nga ekzekutivi. Ai ngre si problem kryesor situatën e rëndë me mbeturinat në fshatrat e Prishtinës, ku sipas tij ato mblidhen shumë rrallë, ndërsa qytetarët vazhdojnë të paguajnë shërbimin dhe kërkojnë masa urgjente, madje edhe pezullimin e pagesave derisa shërbimi të normalizohet. Osmani kërkojë sqarime për disa projekte të përfunduara në buxhetin 2026, si furnizimi me ujë për Lagjen Kurti dhe fshatin Rimanishtë, rregullimi i një rruge në Vranidoll, si dhe informata për projektin dhe lejen e ndërtimit për shkollën në Besi, për të cilën Ministria ka premtuar financim prej disa vitesh.

Nora Kelmendi paraqiti dy shqetësime të qytetarëve. Së pari kërkojë sqarime nga Drejtoria e Arsimit se kur do të fillojë procesi mësimor në shkollën në Emshir, pasi objekti sipas banorëve tashmë është përfunduar dhe, së dyti, përcjell kërkesat e banorëve të lagjes “Hyzri Talla” në Bregun e Diellit, të cilët ankohen për mungesë investimesh, kanalizime të bllokuara që shkaktojnë përmytje gjatë reshjeve, shkallët në gjendje të keqe dhe mungesë të hapësirave të gjelbra dhe parkingut, duke kërkuar ndërhyrje nga Komuna.

Gëzim Sveçla falënderoi drejtorët që qëndruan deri në fund të seancës dhe theksoi rëndësinë e pikës “Pyetje–përgjigje” për adresimin e shqetësimeve të qytetarëve dhe për rritjen e performancës së ekzekutivit. Ai përgëzon emërimin e nënkryetarit dhe kërkoi që sa më shpejt të silllet në Kuvend rregullorja për “Prishtina Parking”, për të qartësuar situatën me gjobat pas vendimit të Gjykatës Supreme. Sveçla theksoi se Lëvizja Vetëvendosje do të mbështesë çdo vendim që i shërben qytetit, pavarësisht politikës, dhe bën thirrje që ekzekutivi të ndërmarrë hapa për zgjidhjen e problemit me mbeturinat dhe për funksionalizimin sa më të shpejtë të qeverisjes në interes të qytetarëve të Prishtinës.

Sokol Havolli u përgjigjet në disa çështje të ngritura nga kolegët e asamblesë, sa i përket fshatit Rimanishtë. Ai sqaroi se plani për furnizimin me ujë të pijshëm kërkon koordinim me kompaninë e ujësjellësit, por gjatë viteve të fundit janë bërë investime në rreth 32 km rrjet kanalizimi për mbrojtjen e ujërave natyrore për rrugën në Vranidoll, investimet më të vogla bëhen përmes kontratave zonale, ndërsa për rrjetin e kanalizimit janë krijuar kushtet për intervenim rrugor, për lagjen “Bregu i Diellit” dhe rr. “Hyzri Talla”. Janë bërë investime infrastrukturore, përfshirë riorganizimin e rrugës “Xheladin Rekalju” dhe hapësirat për parking, ndërsa mbetet nevoja për riorganizim të trotuareve dhe kontroll mbi parkingjet ilegale. Havolli theksoi se sa i përket rregullores së “Prishtina Parking”, punimet janë përfunduar sipas rekomandimeve të Gjykatës Supreme, dhe propozohet që në periudhë të shpejtë të sjellët plotësimi i rregullores për qartësi dhe zbatim të saktë.

Endrit Zabërgja falënderoi drejtorët dhe kolegët për durimin dhe bashkëpunimin gjatë seancës, duke uruar veçanërisht drejtorin Sokol Havolli, ai propozon që në të ardhmen pyetjet dhe përgjigjet nga qytetarët të trajtohen në fillim të seancave, për të rritur transparencën dhe për të lehtësuar punën e drejtorëve. Zabërgja nënvizoi rëndësinë e bashkëpunimit, pa marrë parasysh ndarjet politike dhe thekson nevojën për të diskutuar çështje praktike, si pastrimi, në një gjuhë të përbashkët për të ndihmuar qytetarët dhe për të marrë vendime të duhura.

Betim Abdullahu ngriti shqetësime për gjendjen kritike të fshatit Vranidoll, duke adresuar pyetje drejtuar Drejtorisë së Investimeve Kapitale dhe Drejtorisë së Emergjencave: Rruga dhe kanalizimi janë në gjendje të mjerueshme, pusetat janë të thyera dhe fekale dhe ujërat atmosferikë dalin në oborret e banorëve, gropat e mëdha pengojnë qarkullimin e autobusëve, duke krijuar vështirësi për studentët dhe nxënësit. Abdullahu kërkon vendosje të shenjave sinjalizuese afër shkollës për sigurinë e fëmijëve, pasi rruga kryesore është e rrezikshme për shkak të trafikut dhe dëmtimeve të infrastrukturës. Ai shpreson që të merren masa urgjente për riparimin e rrugëve, kanalizimeve dhe sigurimin e qasjes së sigurt për banorët dhe nxënësit.

Feim Osmani theksoi urgjencën e ndërhyrjes në fshatin Vranidoll dhe rrethe, Rruga dhe kanalizimi janë në gjendje kritike, ujërat atmosferike dhe fekalet përfshijnë shtëpitë për shkak të mungesës së gropave septike dhe kanalizimeve jo funksional që nga viti 2008. Osmani tha se problemet ekzistojnë edhe në fshatrat Rimanishtë dhe Besi, ku ujërat e zeza grumbullohen në hapësira të hapura, duke rrezikuar ambientin dhe duke kundërmuar aromë të padurueshme në stinën e verës. Ai kërkoi veprime urgjente për riparimin e rrugëve dhe kanalizimeve për të mbrojtur banorët dhe ambientin.

Sokol Havolli u shprehu i gatshëm për bashkëpunim të drejtpërdrejtë me ekipet teknike për intervenime emergjente dhe mbrojtjen e infrastrukturës, duke përfshirë, trajtimin me prioritet të ujërave të zeza jashtë rrjetit të dedikuar, intervenime në hapësirat që janë kompetencë e Komunës, duke ndihmuar edhe në ato që varen nga niveli qendror (Ministria e Infrastrukturës), për të mbrojtur pasurinë dhe sigurinë e qytetarëve. Havolli vlerësoi nevojën për inspektim të terrenit me kolegët e asamblesë, për të adresuar problemet specifike në mënyrë praktike.

Lulzim Fushtica dha përgjigje për dy çështjet kryesore: Siguria te shkolla në Vranidollë është bërë vlerësimi i rrezikshmërisë për 66 shkolla të kryeqytetit, përfshirë shkollën në Vranidoll dhe rekomandimet për masat e sigurisë do të implementohen së shpejti në bashkëpunim me Drejtorinë e Shërbimeve Publike dhe Drejtorinë e Arsimit. Fushtica tha se sa i përket Vërshimeve dhe mungesës së kanalizimit në Vranidoll, janë regjistruar dëme nga vërshimet e janarit, është përgatitur raport dhe rekomandim për ndërhyrje, dhe është themeluar komisioni për vlerësimin e dëmeve dhe kërkesat për dëmshpërblim do t'i dërgohen qeverisë sipas Rregullores së vitit 2022.

Shkëmb Manaj thekson se përgjigjet e disa drejtorëve munguan, veçanërisht nga Drejtoria e Shërbimeve Publike dhe Drejtoria e Arsimit, dhe kërkoi që në seancat e ardhshme të qëndrojnë deri në fund për t'iu dhënë qytetarëve informacion të plotë, për çështjen e pastrimit, sugjeron një seancë të veçantë për të diskutuar menaxhimin e mbeturinave. Manaj u shpreh se drejtorët dhe zyrtarët e Komunës janë të obliguar të përgjigjen brenda afateve ligjore për çdo pyetje të Kuvendit, nëse nuk e bëjnë, anëtarët duhet të njoftojnë Kuvendin. Ai shprehu mendimin se seanca ishte e frytshme, pasi janë diskutuar pika me rëndësi për kryeqytetin dhe qytetarët e Prishtinës.

Mbledhja përfundoi në orën 14:53

Procesmbajtësi
Skender Tora

Kryesuesi i Kuvendit
Fehmi Karapina

